

Nalunaarut naatsoq

Immikkut ittumik atuartitaasut
Meeqqat atuarfianni inaarutaasumik
misilitsittut

Ilinniartitaanermut Aqutsisoqarfik – Uddannelsesstyrelsen

Maaji 2022

NAALAKKERSUISUT
GOVERNMENT OF GREENLAND



Imaarisai

Tunuliaqutaa.....	2
Siunertaa.....	2
Atuarfimmi atuartitsineq.....	2
Naliliineq uppersaasiinerlu.....	3
Atuarsimanermik uppersaasaat	3
Misilitsinnermi peqataannginneq aamma immikkut atugaqartitaalluni misilitsinneq	3
Inaarutaasumik misilitsinneq isissutaasinnaasoq.....	5
Atuartup iliuusissatut pilersaarutaa	5
Paasissutissat.....	6
Eqikkaaneq	8

Tunuliaqutaa

Inatsisartut 2021-mi ukiakkut ataatsimiinnerminni aalajangiussassatut siunnersuut akuersissutigaa, atuarfimmi specialklassini atuartut qassit meeqqat atuarfianni inaarutaasumik misilitsinnernut nalunaarutigineqartarnersut qassillu naammassisarnersut nalunaarusiarineqassasoq. (UKA 2021/76).

Nivi Olsenip, Demokraatineersup, aalajangiussassatut siunnersuumminut tunuliaqutigaa, atuartut immikkut ittumik atuartitaasut meeqqat atuarfiata naammassinerani inaarutaasumik misilitsinnernut peqataanissaannut nalunaarutigineqartartut taakkuninngalu naammassinnittartut ikippallaarnerat. Siunnersuuteqartup nalilerpaa, taamatut pisoqartarnerata allanngortinneqarnissaa siunnerfigalugu suliniuteqartoqarnissaa pisariaqartinneqartoq, kissaatigalugulu taakkunani pineqartuni pitsannguuteqartoqarnissaata qulakkeerneqarnissaa. Tamanna tapersorsorneqarpoq, inuit innarluutillit illersuisoqarfiata Tiliup arlaleriarluni taakkua pillugit ilisimasat amigarnerannik isornartorsuisarnermigut.

Nalunaarusiaq naatsoq Ilinniartitaanermut Aqutsisoqarfiup, Ilinniartitaanermut, Kultureqarnermut, Timersornermut Ilageeqarnermullu Naalackersuisoqarfiup ataaniittup, suliaraa. Nalunaarusiamut paasissutissat atorineqartut kommunit atuartunik paasissutissiiffianni programmimi Tabulex TEA-meersuupput aammalu atuarfiit oktoberimi nalunaarutigisartagaanneersuullutik. Nalunaarusiamut uunga atatillugu Ilinniartitaanermut Aqutsisoqarfiup kommunit paasissutissat atuartunik paasissutissiiffimmi programmimiittut uppersarsaqqullugit qinnuigai, paasissutissallu taakkua Ilinniartitaanermut Aqutsisoqarfiup paasissutissanut karakterdatabasemi nammineq pigisaminiittunut sanilliuppai.

Siunertaa

10. klassimi immikkut ittumik atuartitaasut ilaat qanoq amerlatigisut meeqqat atuarfiata naammassinerani inaarutaasumik misilitsinnerni peqataasarnersut saqqummiunneqarnissaat nalunaarusiami siunertarineqarpoq. Nalunaarusiami paasissutissat ukiuni atuarfiusuni kingullerni tallimani: 2016-2017, 2017-2018, 2018-2019, 2019-2020 aamma 2020-2021-mi nalunaarsorneqartut ilanngunneqarput.

Nalunaarusiakku matumuunakkut inatsisini periarfissaasut eqqumaffigineqarnerisa annertusinissaat peqataaffiginiarneqarpoq, meeqqat atuarfianni immikkut atugassaqartitaalluni inaarutaasumik misilitsittarnerit piareersarsinnaajumallugit, pingaartumik atuartunut immikkut ittumik atuartitaasunut. Tassami meeqqat atuarfianni immikkut atugassaqartitaalluni inaarutaasumik misilitsinnerit piareersartarnerini siunertarerpiarneqarpoq, atuartut meeqqat atuarfianni inaarutaasumik misilitsinnerni peqataannginnissamat akuerineqartut sapinggisamik ikinnerpaajussasut. Taamaaliornikkut atuartut amerlanerit meeqqat atuarfiat naammassiinnarlugu inuusuttut ilinniarsiini aallartinnissaminnut periarfissaqalissapput.

Atuarfimmi atuartitsineq

Atuarfik pillugu Inatsisartut inatsisaanni nr. 15, 3. december 2012-imi § 31, imm. 1 naapertorlugu meeqqat atuarfianni atuartussaataaneq ukiunik qulinik sivissussuseqarpoq. Atuartitaaneq atuarfik pillugu inatsit naapertorlugu aqqissuunneqartussaavoq ingerlanneqarlunilu. Alloriarfinni tamani (nukarlerni, akullerni angajullernilu) atuartitsinerup siunertai pingaarnerit Atuarfimmi atuartitsissutini atuartitsissutinilu qanitariissuni alloriarfiit siunertaat kiisalu atuartitsissutit siunertaat ilikkagassatullu anguniagassat pillugit Namminersornerullutik Oqartussat nalunaarutaanni nr. 16, 24. juuni 2003-meersumi aalajangersagaapput.

Naliliineq uppersaasiinerlu

Atuarfik pillugu inatsimmi § 22 naapertorlugu atuartitsinnermut ilagitillugu atuartut ataasiakkaat atuartinneqarnerminnit pissarsiaat ingerlaavartumik nalilersorneqartassapput. Nalilersuinerup atuartup nammineerluni naliliinera aallaavigisassavaa. Taamatuttaaq nalilersuineq atuartup atuartitsinneqarnerata pilersaarusoqqinneranut aammalu ilinniagaqaqqinnissaanut inuutissarsiutigiumaagassaminillu qinigaqarnissaa pillugit siunnersuinissamut tunngaviusussaavoq. Atuartup nalilerneqarnerani siunnersorneqarneranilu angajoqqaat ingerlaavartumik peqataatinnegartartussaapput.

Nukarliit alloriarfiata (3. klassip) akulliillu alloriarfiata (7. klassip) naammassinerini atuartup atuarnermini pissarsiai ataatsimoortumik nalilerneqartassapput, naliliinerlu taanna atuartut ataasiakkaat atuarnerminni ingerlaqqinnissaasa pilersaarusionerannut tunngaviusaaq. Naliliineq taanna ukuninnga ilaqarpoq:

- Ingerlaavartumik naliliinerup inerneru.
- Atuartup naliliinerup nalaani atuartitsinnermi piginnaasassatigut killiffii.
- Alloriarfinni misilitsinnerit inerneru.

Atuartup atuarfimmi pissarsiai uppersaarumallugit angajullit alloriarfiat (10. klassi) atuartup atuarnermini pissarsiaanik ataatsimoortumik nalilersuinerumik naammassineqassaaq. Nalilersuinerumi ukua ilaatinneqassapput:

- Angajullit alloriarfiata ingerlanerani ingerlaavartumik naliliinerup inerneru.
- Atuartup atuartitsissutini tamani angusaanik naliliineq.
- Atuartup meeqqat atuarfianni inaarutaasumik misilitsinnerata inerneru (atuarfiup inaarutaasumik naliliineranik).

Atuarsimanermik uppersaasaat

Atuarfiup naammassinerani atuartut tamarmik atuarsimanerminnut uppersaammik, atuarfiup suliarisimasaanik, pissarsitinnegassapput. Atuarsimanermik uppersaasaatip imarissavai:

- Atuarfiup 10. klassimi projektilerinnermut oqaaseqaataa.
- Atuartoq atuartitsissutini sorlarni atuartinneqarsimanersoq atuartitsissutinilu taakkunani tamani atuarfiup oqaaseqaatai.
- Atuartup angusani tunngavigalugit karakterii misilitsikkamilu karakterii.

Atuarsimanermik uppersaasaat atuartup allamik immikkut ittumik perorsaanikkut atuartitsinikkullu ikiorserneqarsimaneranik, imaluunniit atuartup specialklassimi atuarsimaneranik imaqqanngilaq. Aamma atuartoq immikkut atugaqartitaalluni misilitsissimanersoq allassimassanngilaq. Atuartoq atuartitsissummi ataatsimi arlaqartuniluunniit inaarutaasumik misilitsinnerni peqataannginnissaminut akuerineqarsimappat, tamanna atuarsimanermik uppersaasammi ilanngunneqartussaavoq.

Misilitsinnermi peqataannginneq aamma immikkut atugaqartitaalluni misilitsinneq

Ilinniartitaanermut Aqutsisoqarfiup september 2020-mi ilitsersuut [Immikkut atugaqarluni misilitsinneq misilitsittussaajunnaarnerlu](#) saqqummersippaa. Ilitsersuummi atuartut inaarutaasumik misilitsinnerni peqataannginnissamut akuerineqartut ikinnerulernissaat siunertarineqarpoq. Ilitsersuummi immikkut atugaqartitaalluni misilitsinnerni kiisalu misilitsinnerni peqataannginnissamut akuersinnermi malittarisassat

atugassarititaasullu erseqqissarneqarput nassuiarneqarlutillu. Taamatutaaq 10. klassimi immikkut atugaqartitaalluni inaarutaasumik misilitsinnerit pilersarusiornissaannut naammassinissaannullu atuarfiit pisortaasa atuartitsisullu periarfissaat erseqqissarneqarput.

Peqataannginnissamut akuerineqarluni misilitsinnermi peqataannginneq

10. klassimi atuartut tamarmik atuartitsissutini atuartinneqarfigisimasaminni atuarfimmi inaarutaasumik misilitsittussatut nalunaarutigineqarnissaat aallaaviusarpoq. Tamanna specialklassini atuartunut aamma atuuppoq.¹

Pissutsinik atuuttoqarsinnaavoq, atuartup atuarfiup atuartitsissummi ataatsimi arlaqartuniluunniit inaarutaasumik misilitsitsinerani peqataasinnaannginneranik kinguneqartumik. Peqataannginnissamut akuerisaaneq assigiinngitsunik peqquaterqarsinnaavoq. Atuartup timimigut isumaliortaatsimigulluunniit piginnaanikillismanera imaluunniit ataatsimut isigalugu ilikkagaqarniarnerminik ajornartorsiuteqarnera assersuutaasinnaapput. Taakkua ima annertutigisinnaapput angajullit alloriarfiata naammassinerani atuartitsissutitut ilikkagassatut anguniagassat aalajangersagaasut atuartumit naammassineqarsinnaanerit piviusorsiortuusarani.

Atuarfiit ataasiakkaat pisortaasa inaarutaasumik misilitsinnerni peqataasinnaannginnermut akuersissuteqassanersoq aalajangiiffigisussaavaat. Inaarutaasumik misilitsinnerni peqataannginnissamut akuersissummik aalajangiilernermi piumasarineqartarpoq, atuartoq immikkut atugaqartitaalluni misilitsissinnaanersoq isummerfigineqareersimassasoq. Atuartup ilinniartitsisui angajoqqaavilu tamatigut isumasioqatigalugit misilitsinnerni peqataannginnissamut akuersisoqartassaaq.

Peqataannginnissamut akuersissutit ilinniartitaanermut Aqutsisoqarfimmut ukiut tamaasa kingusinnerpaamik 1. decemberimi nalunaarutigineqartassapput, atuarfiullu pisortaata atuartup inaarutaasumik misilitsinnerni peqataannginnissaanut akuersinerminut tunngavigisani naatsumik allaaseralutit ilannguttussaavai.

Immikkut atugaqartitaalluni misilitsinneq

Immikkut atugaqartitaalluni misilitsitsisarnerni siunertarineqarpoq, atuartut amerlanerpaat atuarfimmi inaarutaasumik misilitsinnernik naammassisaqarnissaannut periarfissiinissaq. Piumasaqaataavoq immikkut atugaqartitaalluni misilitsitsinernik neqeroorutini misilitsinnerit ilikkagassatigut qaffasissusaannik allanngortitsinnginnissaq. Atuarfiup pisortaata atuartunut timimikkut imaluunniit isumaliortaatsimikkut annertuumik piginnaanikillisimasunut, imaluunniit ataatsimut isigalugu ilikkagaqarniarnermikkut ajornartorsiuteqartunut immikkut atugaqartitsinissaq neqeroorutigisinnaavaa.

Immikkut atugaqartitsilluni misilitsitsinissamut apeqqutaasarpoq:

- Atuartup piginnaanikillisimanera qanoq ittuunersoq.
- Piginnaanikillisimanermut pineqartumut taartaasinnaasumik pisariaqartitsisoqarnerasoq (atuartoq ikiutit immikkut ittunik pisariaqartitsiva? atuartoq piffissamik sivitsuinissamik pisariaqartitsiva? atuartup kisimiilluni misilitsinnissani pisariaqartippaa?).

¹ Tamanna Ado Lyngep Atuarfiani Tungujortuaqqamilu atuartunut atuutinngilaq.

Tamatumunnga tunngatillugu atuarfiup paasiniassavaa piginnaanikillissimaneq misilitsinnermi atuartumut sutigut ajornartorsiuteqartissannersoq, tamannalu tunngavigalugu aalajangiilluni misilitsinnermi immikkut atugassarititaasut suut atuartumut neqeroorutigineqassannersut.

Inaarutaasumik misilitsinneq isissutaasinnaasoq

Atuarfiup inaarutaasumik misilitsinera soraarummeernerunngilaq angusinngitsoorfissat; taamaattumik misilitsinnermik taaneqartarpoq, soraarummeerneramik taaneqarani.

Meeqqat atuarfianni taaguutit soraarummeerneq, angusineq, angusinnginneq imaluunniit isissutaasinnaasoq atugaanngillat. Atuartup atuarfimmi angusaasa qanoq ilinniagaqarnissamut isissutaasinnaanerannut apeqqutaavoq inuusuttut ilinniarfii ataasiakkaat tassani ilinniagaqalernissamut immikkut sunik piumasaqaateqarnersut. Ilinniagaqalernissamut piumasaqaatit taakkua ilinniarfimmiit ilinniarfimmut assigiinngitsuusinnaapput.

Atuartoq inaarutaasumik misilitsinnerni tamani aammalu angusat tunngavigalugit karakterini minnerpaamik E-mik karaktereqanngippat, tamanna atuartup atuarfimmiit ingerlaannartumik inuusuttut ilinniarfianni aallartinnissaminut periarfissaanut sunniuteqarsinnaavoq. Atuartoq atuartitsissummi ataatsimi arlaqartuniluunniit misilitsinnerni peqataannginnissamut akuerineqarsimappat, tamanna aamma atuarfimmiit ingerlaannartumik ingerlariaqqinnissamut periarfissaanut sunniuteqarsinnaavoq.

Tassunga ilanngullugu oqaatigineqarsinnaavoq, ilinniarfiit tamarmik atuartup meeqqat atuarfianni inaarutaasumik misilitsissimanissaa piumasaqaatigisarmassuk. Inuusuttut ilinniarfiisa ataasiakkaat nittartagaannut sunngu.gl-mi innersuussissuteqarpoq. Majoriaqarfiit, ilinniagaqarnissamut isissutissanik piareersarnernik neqerooruteqartartut, isissutissanik taakkuninnga ilinniagaqalernissamut meeqqat atuarfianni atuartitsissutini inaarutaasumik misilitsissimanermik imaluunniit atuartitsissutini karakterinik aalajangersimasunik piumasaqaateqarneq ajorput.

Atuartup iliuusissatut pilersaarutaa

Atuarfimmi atuarnerup ingerlanera tamakkerlugu atuartut ataasiakkaat iliuusissatut pilersaarusiorteqartarput.²

Atuartunut ataasiakkaanut iliuusissatut pilersaarusiorternerup siunertaraa, atuartut atuartitsissutini ataasiakkaani ilikkagassatut anguniagassat naapertorlugit ilinniagassanik ilikkagaqarnissaannik qulakkeerinninnissaq. Iliuusissatut pilersaarut atuartup atuartinneqarnerata ingerlateqqinnissaanut ilinniagaqalernissaanullu aamma aallaaviusarpoq. Pingaartuuvoq atuartup iliuusissatut pilersaarutaani atuartup meeqqat atuarfiata naammassinerani inaarutaasumik misilitsinnerni peqataanissaata ingerlaavartumik aamma eqqumaffigineqarnissaa. Tamatumani atuartup meeqqat atuarfiata kingorna ilinniagaqalernissaminut pitsaanerpaamik periarfissaqarnissaa anguniarlugu siunertarineqartarpoq.

Atuartunut immikkut atuartitaasunut imaluunniit allamik immikkut ittumik perorsaanikkut ikiorserneqartunut aamma piumasaqaataavoq, atuartup klasselæria ilinniarfitsisullu meeqqamik tassanga atuartitsisut minnerpaamik qaammatit allortarlugit atuartut ataasiakkaat pillugit pædagogikki aallaavigalugu

² § 19, Atuarfik pillugu Inatsisartut inatsisaanni nr. 15, 3. december 2012-imeersumi

pilersaaruseriorlutik ataatsimiittarnissaat. Ataatsimiinnerni taakkunani atuartut ataasiakkaat atuartinneqarnissaata pilersaaruseriorneqarnera ilusilersorneqartarpoq nalilersorneqarlunilu.³ Taamatut ataatsimiittarnerit atuartunut ataasiakkaanut iliusissatut pilersaaruserianut, siuliani taaneqartunut, ilassutaapput.

Paasissutissat

Ukiuni atuarfiusuni 2016-2017-imit 2020-2021-mut 10. klassimi nuna tamakkerlugu atuartut katillugit 648-t aamma 715-it akornanni amerlassuseqarput. Taakkunanga piffissami tassani ukiut atuarfiusut 10-anni atuartut immikkut ittumik atuartitaasut 65-it aamma 77-it akornanni amerlassuseqarput.

Ukiut atuarfiusut 10-anni atuartut tamakkerlutik amerlassusii 2018-imit 2019-imut malunnartumik atuartunik 50-inik ikileriarput, tamatumalu kingorna 2021-mi 715-imut amerleriaqqillutik.

Tabel 1 Atuartut amerlassusii

Nuna tamakkerlugu 10. klassimi atuartut amerlassusii			
Ukiuq atuarfiusuq	10. klassimi atuartut tamakkerlutik	Taakkunanga immikkut ittumik atuartitaasut	Taakkunanga immikkut ittumik atuartitaasut - %-nngorlugit
2016-2017	686	65	9%
2017-2018	698	77	11%
2018-2019	648	75	12%
2019-2020	698	71	10%
2020-2021	715	76	11%
Katillugit	3.445	364	11%

Najoqqutat: Kisitsisit kommuniniit nalunaarutaasut

Soorlu tabel 1-imi takuneqarsinnaasoq 10. klassimi atuartut amerlassusii 2017-imit 2021-mut allanngorartuupput. 2019-imi atuartut ikinnerpaapput, 2021-milu amerlanerpaajullutik. Piffissami pineqartumi ukiumi atuarfiusumi tassani atuartut 29-inik amerleriarput, tassa 4,2 %-imik.

Taamatutaaq ukiut atuarfiusut 10-anni atuartut immikkut ittumik atuartitaasut amerleriarput, ukiumilu atuarfiusumi tassani atuartut aalajangersimakannersumik 9 – 12 %-ii immikkut ittumik atuartitaasarput.

Ukiut tallimat ataatsimut isingaaanni ukiut qulissaanni atuartut katillugit 3.445-pput, taakkunanga 364-it specialklassini atuartuupput, tassa 11 %-ii.

Atuartut specialklassiniittut qassit atuartitsissummi ataatsimi arlaqartuniluunniit inaarutaasumik misilitsissimanersut tabel 2 misissoraanni takuneqarsinnaavoq 2017-imi atuartut 11-it 2021-mi atuartunut 15-inut annikitsumik amerlerialaarsimasut.

³ § 14 imm. 2, Meeqqat atuarfianni immikkut atuartitsisarneq aamma allamik immikkut ittumik perorsaanikkut ikiorsisarneq pillugit Namminersorlutik Oqartussat nalunaarutaanni nr. 21, 8. december 2017-imeersumi.

Tabel 2 Atuarfimmi inaarutaasumik misilitsinnerni peqataaneq

Inaarutaasumik misilitsinnerni peqataaneq			
	Atuartut immikkut ittumik atuartitaasut – 10. kl	Taakkunanga atuartitsissummi ataatsimi arlaqartuniluunniit misilitsinnerni peqataasut	Taakkunanga atuartitsissummi ataatsimi arlaqartuniluunniit misilitsinnerni peqataasut – %-inngorlugit
2017	65	11	16,9 %
2018	77	4	5,2 %
2019	75	12	16,0 %
2020	71	4	5,6 %
2021	76	15	19,7 %
Katillugit	364	46	12,6 %

Najoqqutat: Kisitsisit kommuniniit nalunaarutaasut

Ataatsimut katikkaanni ukiuni atuarfiusuni kingullerni tallimani ukiut qulissaanni atuarfiusumi specialklassini 364-it atuartuupput, taakkunangalu atuartut 46-ut atuartitsissummi ataatsimi arlaqartuniluunniit inaarutaasumik misilitsissimapput, tassa atuartut pineqartut 12,6 %-ii.

Tabel 3 Ukiut 10-ssaanni immikkut ittumik atuartitaasut amerlassusii – misilitsinnerit amerlassusii

Ukiut 10-ssaanni immikkut ittumik atuartitaasut amerlassusii – Inaarutaasumik misilitsinnerit						
Ukioq atuarfiusoq	Peqataangitsut	Misilitsinneq ataaseq	Misilitsinnerit 2-4-t	Misilitsinnerit 5-8-t	Misilitsinnerit 9-t	Katillugit
2016-2017	54	0	5	3	3	65
2017-2018	73	1	0	3	0	77
2018-2019	63	0	9	2	1	75
2019-2020*	67	4	0	0	0	71
2020-2021	61	8	3	4	0	76
Katillugit	318	13	17	12	4	364

*Misilitsinnerit tamarmik – projektopgave kisimi pinnani – ukiumi atuarfiusumi 2019/20-mi Covid-19 pissutigalugu taamaatinneqarmata

Tabel 3-mi takuneqarsinnaavoq piffissami 2017-2021-mi specialklassini atuartut qanoq amerlatigisut meeqqat atuarfianni inaarutaasumik misilitsinnerni peqataasimanersut. Ilisimatitsissutigineqassaaq Covid-19 pissutigalugu ukiumi atuarfiusumi 2019-2020-mi inaarutaasumik misilitsinnerit, projektilerineq kisiat pinnagu, atuartunut tamanut taamaatinneqarmata.

Ukiut atuarfiusut qulissaanni specialklassini atuartut 364-iusunit 318-it piffissami pineqartumi atuarfimmi inaarutaasumik misilitsinnerni peqataanginnissaat akuersissutigineqarpoq, tassa atuartut taakkua 87,4 %-ii. Specialklassini atuartut sinneri 46-rut misilitsinnermi ataatsimi arlaqartuniluunniit peqataapput. Tassa imaappoq piffissami 2016-2017-imit 2020-2021-mut ukiut atuarfiusut qulissaanni specialklassini atuartut 12,6 %-ii atuarfimmi inaarutaasumik misilitsinnermi ataatsimi arlaqartuniluunniit misilitsipput.

Ukiumi atuarfiusumi 2020-2021-mi ukiut qulissaanni specialklassini atuartut amerlanerpaat inaarutaasumik misilitsipput, tassa specialklassini atuartut 76-iusuni 15-it misilitsinnermi ataatsimi arlaqartuniluunniit

misilitsimmata. Tassa imaappoq ukiumi atuarfiusumi 2020-2021-mi ukiut atuarfiusut qulissaanni specialklassini atuartut missiliorlugit tallimat akornanni ataaseq misilitsinnermi ataatsimi arlaqartuniluunniit misilitsippoq.

Tabel 4 Ukiut 10-ssaanni immikkut ittumik atuartitaasut amerlassusii – projektopgavi

Ukiut 10-ssaanni immikkut ittumik atuartitaasut amerlassusii – Projektopgavi			
Ukioq atuarfiusoq	Peqataangitsut	Naammassinnittut	Katillugit
2016-2017	57	8	65
2017-2018	74	3	77
2018-2019	73	2	75
2019-2020*	67	4	71
2020-2021	64	12	76
Katillugit	335	29	364

*Misilitsinnerit tamarmik – projektopgavi kisimi pinnani – ukiumi atuarfiusumi 2019/20-mi Covid-19 pissutigalugu taamaatinneqarput

Tabel 4-mi takuneqarsinnaavoq, ukiut atuarfiusut qulissaanni specialklassini atuartut qanoq amerlatigisut piffissami 2017-2021-mi projektilerineq naammassineraat. Tassa specialklassini atuartut 364-iusuni 29-t projektilerinerminnik naammassisaqarput, procentinngorlugu 8 %-ii. Ukiut atuarfiusut qulissaanni specialklassini atuartut sinneri 335-t projektilerinnermi peqataanginnissaminnik akueritipput, tassa atuartut taakkua 92 %-ii.

Ukiumi atuarfiusumi 2018-2019-imi specialklassini atuartut ikinnerpaat projektilerinerminnik naammassisaqarput, tassami specialklassini atuartut 75-iusut akornanni taamaallaat marluk misilitsinnermik tassannga naammassisaqarmata. Taassuma akerlianik ukiumi atuarfiusumi 2020-2021-mi projektilerinnermik naammassisaqartut amerlanerpaapput, piffissami tassani specialklassertut 76-iusuni 12-it misilitsinnermik tassannga naammassisaqarmata, tassa atuartut taakkua 16 %-ingajarisaat.

10. klassimi projektilerineq inaarutaasumik misilitsinnernut ilaavoq atuartullu tamarmik pinngitsooratik suliaasaralugu. Projektilerineq atuartitsissutit arlaqartut akimorlugit ingerlatassaavoq, atuartut qulaajagassamik, namminneerlutik oqaasertaleeqataaffigisaminnik, misissuiffigisassaat. Atuartut atuartitsissutit assigiinngitsut imarisaat taakkunanilu periutsit atornerqartut atorussaavaat, aammalu atuartitsissutit atuartitsissutillu qanitariissut nalinginnaasumik misilitsissutaaneq ajortut, ilanngussinnaallugit. Projektilerinerup siunertaasa ilagivaat, atuartut nutaaliornikkut assassornikkulluunniit, imaluunniit allatigut immikkut piginnaaneqarfimminnik soqutigisaminnilluunniit ingerlataqarsinnaanissaat.

Paasissutissat naatsumik oqaatigalugit

Paasissutissat Ilinniartitaanermut Aqutsisoqarfiup karakterdatabaseanit, kommunit oktoberimi nalunaarutaanniit (Ilinniartitaanermut Aqutsisoqarfimmut nassiuunneqartartuniit) kiisalu Tabulex TEA-miit (kommunit atuartut pillugit programmiannit paasissutissiiffimmiit) pissarsiarineqarput.

Eqikkaaneq

Ukiuni tulleriinni Ilinniartitaanermut Aqutsisoqarfiup 10. klassimi specialklassini atuartut ilaasa amerlasuut meeqqat atuarfianni inaarutaasumik misilitsinnerni peqataanginnissamut akuerisaasarnerat maluginiarsimavaa.

Ilinniartitaanermut Aqutsisoqarfiup paasissutissaatai malillugit meeqqat atuarfianni immikkut atugassaqartitaalluni inaarutaasumik misilitsissinnaanermut periarfissat, inatsisini atuuttuni piusut, naammaginantumik atorneqarneq ajorput. Tamanna tunngavigalugu Ilinniartitaanermut Aqutsisoqarfiup 2020-mi immikkut atugassaqartitaalluni misilitsittarnerit misilitsinnernilu peqataanginnissamut akuersisarnerit pillugit iltersuut suliaraa. Iltersuut taanna suli atuukkiartortitaavoq, pingaartumik specialklassini atuartut amerlanerit meeqqat atuarfiata inaarutaasumik misilitsitsisarnerini peqataanissaminnut periarfissinneqarnissaat eqqarsaatigalugu. Taamatut pisoqarneratigut atuartut meeqqat atuarfiat naammassiinnarlugu inuusuttut ilinniarfiini ilinniagaqalernissamut pitsaanerusequmik periarfissinneqartussaapput.

Pingaartuuvoq atuarnep ingelarnge tamakkerlugu atuarfiup angajoqqaallu atuartup atuartitaanerani ilinniagaqarniarneranillu malinnaanissaat, soorlu immikkoortumi '*Atuartup iliuusissatut pilersaarutaa*'-ni tamanna takuneqarsinnaasoq. Tamanna atuuppoq apeqqutaatinnagu atuartoq specialklassimi imaluunniit klassimi nalinginnaasumi atuartuunersoq. Taamaattumik atuartup atuartuunerani meeqqat atuarfianni inaarutaasumik misilitsinnerni piunasaqaatinik naammassisaqarsinnaanissaata siunertarinqartuarnissaa pingaartuuvoq. Tamanna specialklassini atuartunut aamma atuuppoq, atuartitsissutinilu atuartitsinerup saniatigut atuartoq meeqqat atuarfianni inaarutaasumik misilitsinnernik naammassisaqassappat immikkut atugassarititaasut suut atuutsinneqarnissaat immaqa aamma sulissutaassussaassaaq.

Specialklassimi atuartup meeqqat atuarfianni inaarutaasumik misilitsinnissaanut atuarfik angajoqqaallu immikkut ittumik suliniuteqartussaassapput. Matumani ikiuutit assigiinngitsut, piffissamik atuerit aamma avatangiisini atugassarititaasut misissorlugillu misilerarnissaat pingaaruteqartuuvoq. Taamatut misileraanermi siunertarinqassaaq atuartup misilitsissutinik naammassinninnissaminut pitsaanerpaamik atugassaqartitaanissaa.